

Njia ya Mubfonyo

sgm

Scripture Gift Mission
ECCLESTON STREET, LONDON, SW1W 9LZ
Printed in Great Britain

*“Chuuu cha Muungu cha moja,
na cha nguvu, ni chikali kuliko
yubfanga yude jwonse jwijo na
makai kuvii.”* Waebrania 4. 12.

*“Chuuu changu . . . ntachinigalii
bure kisidzahenda nidsakieyo na
kutimiza hayade nidamieyo.”*

Isaya 55. 11.

*“Kubfenuka kwa chuocho kuna-
yangaza.”* Zaburi 119. 130.

Kuumbwa Kwa Lumwengu.

Davu Muungu kaumba yuwingu nansi.

I Musa 1. 1.

Yonse yahendwa nacho, na bfasibfo chicho ntachikuwa kintu hata kimo-dza, chichokuwa.

Yohana 1. 3.

Kuumbwa Kwa Muntu.

Muungu kamuumba Adamu kwa yumbo jwakwe, kwa yumbo jwa Muungu kamuumba, muyume na muke kawaumba.

I Musa 1. 27.

Bwana Muungu kamuhenda Adamu na vumbi yansi, kamubfuziza mpuyani nsoho zizo moja. Adamu kagala nafsi iyo moja. Bwana Muungu kahenda nkonde kwa mashariki kwa Eden, kamuweka Adamu amuhendee humu.

I Musa 2. 7, 8.

Bwana Muungu kamuweka Adamu nkondeni mwa Eden aiime na kuitunza. Na Bwana Muungu kamudama Adamu kamwamba: Kwa mihi yonse udye, ela kwa muhi wa kumanyia mema na mazuka nkudzoudye, koro nsiku udzeyodya, kudzafwa.

I *Musa 2. 15-17.*

Kunjia Kwa Navise.

Nyoka iwa nkaro kuchia wadondo wonse Bwana Muungu ahendeo, kamwambia muke: Ati Muungu kanena: Mudsedyanya kwa mihi yonse iyo nkondeni? Muke kamwambia nyoka: Matunda ya nkondeni hunadya, ela matunda ya muhi wiwo kahikahi ya nkonde Muungu kanena: Namdseyadya, nolawe namdseyahora, mudsefwa. Nyoka kamwambia: Kufwa ntamunafwa, koro Muungu anamanya,

kwamba nsiku mudzeyodya kwa muhi huo munabfenujwa madso, nanywi munawa dza Muungu, munahambuya meme na mazuka. Muke kaona ya kwamba muhi ni mwema kwa chakudya na kwa kudsakiza madso nao ni muhi wa kutamanika kwa dzambodya karo. Kahwaa matundaye, kayadya, kamumpa na mumewe nae kadya.

1 *Musa* 3. 1-6.

Muungu kamwambia muke: Kuti kuhenda hivi? Muke kamba: Nyoka kanikulakula, nami nidya. Bwana Muungu kamwambia nyoka: Kwa kwamba kuhenda hivi udujwe kahikahi ya binensa wonse. Ugale kuhambaa na mahumbo na kudya muddsanga maishi. Ninaweka makevo kahikahi yako na muke, kahikahi ya mvyezo na mvyeze. Ae kadza-

kuranga kidswacho, nawe kudzamuu-
ma kisinkino. Muungu kamwambia
muke: Nidzakwinjibfa dsunguwo wa
kuvyaa waana, kudzamkajela mume-
wo, nae anawa mukuuwo. Muungu
kamwambia Adamu: Kwa kwamba
kumuhikiza mkaziwo na kudya ma-
tunda ya muhi nikwambieo nkuzo-
yadye, nkonde idujwe kwa dzambo-
dyo. Unadziisa na dsungu mai shi,
nayo inakuvyaa miwa na vidago
Na hweka dya usoo unadya chaku-
dyacho, hata udzebfofoga mdsanga,
ndibfo uhwejwebfo, koro wewe u
mdsanga na kwa mdsanga unauja,
unawa mdsanga kawii. 1 *Musa* 3. 13-19.

Ngojama mukuu, nyoka jwa kae,
ahadziwe mudawano na Shatani, ada-
nganyize kiringo chansi. *Ubfenuo* 12. 9.

Dzevihivi dza na muntu mumodza
navise zinjia lumwenguni, na kwa

navise ni kufwa, na hivi kufwa kunjia wantu wonse, kwa kwamba wonse wahenda navise. *Warumi 5. 12.*

Madsoa Ya Muntu Mbele Ya Muungu.

Honse hu dza mbuzi zariezo, kula munto kagija njiaye. *Isaya 53. 6.*

Yehova anayowa waana Adamu na yuwinguni dzu, aone kwamba yubfo mumodza awe na mataro mema, auziye Muungu. *Zaburi 14. 2.*

Wonse wauja nyuma, wonse ni wazuka; nkabfo muntu ahendee vyema, hata mumodza. *Zaburi 14. 3.*

Sawa navyo vyorejwevyo: Ntaku muhachi hata mumodza. . . . Njia ya naghea ntawakwihambuya, oga

wa Muungu ntaubfo madsoni kwao.
Koro wonse wahenda navise, na wa-
tura shadu kwa Muungu.

Warumi 3. 10, 17, 18, 23.

Maandiko yafunga yonse nsi ya na-
vise.

Wagalatia 3. 22.

Dsako Dya Muungu Dzu Ya Muntu.

Koro hivihivi Muungu kajudsaka lu-
mwengu, hata kamuyavya mwanawe
madiani, kwa kwamba yude jwonse
amuhikizie jeje adsekwara, ela awe
na moja usiwosia.

Yohana 3. 16.

Humu madsako ya Muungu yabfenu-
jwa kwehu, kwamba Muungu kamu-
huma mwanawe lumwenguni, hukae
mojo kwae. Hayo ndiyo madsako,
si ya kwamba swiswi humudsaka

Muungu, ela kwamba jeje kahudsaka swiswi na kumuhuma mwanawe kuwa diba dya navise zehu. 1 *Yohana* 4. 9, 10.

Kudza Kwa Mwana Jwa Muungu Katika Lumwengu.

Ni chuo chihikizika, kimaliecho mabfokeo yonse, cha kwamba Kristo Yesu kadza lumwenguni kuwabfonya wanavise. 1 *Timoteo* 1. 15.

Kristo Yesu . . . kabfokea yumbo jwa muhumwa. *Wafilipi* 2. 5, 7.

Ewabfo lumwenguni na lumwengu yumawa ni jeje, na lumwengu ntajukumuhambuya. *Yohana* 1. 10.

Kuvyajwakwe Bwana Yesu.

Kuvyajwa kwa Yesu Kristo kuhe-ndeka hivi . . . vitimizwe vinene-

jwevyo ni Bwana ni nabi anenee:
Yowa mwanamuke galtama kadzawa
na mimba na kuvyaa mwana muyume
na saridye anahunigwa Imanuel,
ndidyo chikwehu: Muungu anaswi.

Matayo 1. 18, 22, 23.

Nawe kudzamuhunia sari ndidyo Yesu,
koro jeje kadzawabfonya wantuwe
kwa navise zao.

Matayo 1. 21.

Kukaa Kwakwe Lumwenguni.

Yesu jwa Nazareti dza Muungu amu-
bfakazievyo ni Ruhu Mudheru na
nguvu achie akihenda mema na kuwa-
bfonya wonse waonejweo ni Shatani,
koro Muungu ewa nae. *Mahendo 10. 38.*

Yesu kazinga midzi na vidzidzi, kayo-
ngweza sunagogeni kwao, kasumwia
engili ya uhaju, na karita kula ndwari
na kula kirema. *Matayo 9. 35.*

Wamudzia wantu wenji, wewo na vihewi, mantumbo madso, mabubwi, wenye makumu, na wangine wenji wawaweka maguuni kwa Yesu, nae kawabfonya.

Matayo 15. 30.

Yesu Kadzihubigia Diba Ku- fwani Mwakwe.

Hadi Mwana jwa Adamu ayavigwe mikononi mwa wahenda navise, na kubfadsikwa.

Luka 24. 7.

Ndokomo, wakifika bfantu bfahadzi-jwebfo bfaa, wamubfadsika jeje hukude, na Yesu kamba: Baba, uwayadsie, koro ntawanamanya wevyokuhendani.

Luka 23. 33, 34.

Ewa mubalifa na mwabfukijwa jwa wantu, muntu jwa dsungu na ndwari. Na hachi kadsukuya ndwari zehu, na

dsungu wehu kodzibfaza. Aswi hwi-
chamba ni mubigwa na munyirwa
dinani ni Muungu, na mukukamiswa.
Kenge kahumbujwa kwa dzambo dya
vizuka vyehu, na kubigwa kwa navise
zehu. . . . Hubfona na marondoye
jeje. Honse hu dza mbuzi zariezo,
kula muntu kagija njiaye na Bwana
kamubfazia jeje vizuka vyehu vyonse.
Nae kahunwa nansi ya wenye moja,
kabigwa kwa dzambo dya madsoa ya
wantu wangu. Wamwekea na wazuka
mberaye na kwao matajiri kufwakwe,
nae nkakumwonea muntu nolawe ma-
kulekule ntayakuonwa kanwani mwa-
kwe. Kahiya ruhuye kufwani mwa-
kwe, nae katalika bfamodza nao
wasiwo sheria. Kadsukuya navise ya
wenji na kawayombea wadsoa.

Isaya 53. 3-6, 8, 9, 12.

Kristo kazifwia navise zehu, kwa njia
ya madsoro. *I Wakorinti 15. 3.*

Hivi Yesu kawambia: Mimi ndimi mtikisa mwema. Mtikisa mwema anayavya mojowe kwa dzambo dya mbuzi . . . Ninazo mbuzi zingine, zisizokuwa na delea hidi, hata hizo ni hadi niziyehe, zidzasikia idzwi dyangu, hivi kinawa choo kimodza na mtikisa mumodza.

Yohana 10. 7, 11, 16.

Kufufuka kwa Yesu Na Kubfaa Kwakwe Mbinguni.

Hivi vyoregwa, kwamba Kristo aone-swe na kufufuka kwa wafu nsiku ya hahu. Na kwamba kusumwijwe kwa saridye kubfyehuza mama kwa mayadso ya navise vetini vyonse.

Luka 24. 46, 47.

Ndie afufuijwe nsiku ya hahu ni Muungu, kahenda kwamba aonegwe, si

kwa cheti chonse, kenge kwa masha-
hidi, wadsanijweo dura.

Mahendo 10. 40, 41.

Akisa kuoneswa dsungu, kadziwaya-
nga mwenye moja, ni vihambwizo
vinji, kaonegwa kwao nsiku miyongo
mine, kawambia chicho cha uhaju wa
Muungu. . . . Wao wakwakuyowani,
kabfazwa dzu; na wingu dimunuya
usoni kwao.

Mahendo 1. 3, 9.

Muungu kabfenujwa mwiini, kaya-
vizwa hachi ruhuni, kaonegwa ni
malaika, kasumwijwa vetini, kahi-
kizwa lumwenguni, kabfokejwa mare-
mboni.

1 Timoteo 3. 16.

Kenge sasa Kristo kafufujwa kwa
wafu, jwa dura jwao wayaieo. Koro
kwa kwamba kufwa kudza na muntu
mumodza, vivyo kufufuka kwa wafu

kudza na muntu mumodza. Koro
dza wonse wafwievyo mwa Adamu,
vivyo mwa Kristo wanapata moja
wonse. *I Wakorinti 15. 20, 21, 22.*

Dza Muungu Anavyobfonya Wantu.

Nihendedze nibfonyegwe? Muhikize
Bwana Yesu, hivi kudzabfonyegwa.
Mahendo 16. 30, 31.

Kwa hivyo bfyehuzani nama na ku-
bfyehuka, navise zenu muziyadsijwe.
Mahendo 3. 19.

Mubfyehuye mama, na kula muntu
jwenu atopyege sarini mwa Yesu
Kristo kwa mayadso ya navise, na-
nywi munabfegwa tola ya Ruhu
Mudheru. *Mahendo 2. 38.*

Hukidzinena navise zehu, hivi jeje ni muhikizika na muhachi, kwamba anahuyadsia navise, na kuhudheresa kwa yonse yasiyo hachi. *1 Yohana 1. 9.*

Koro ukimuhikizia Yesu na kanwako, kwamba ni Bwana, na kuhikiza mojoni mwako, kwamba Muungu kamufufuya na wafu, kudzabfonyegwa. Koro mojoni kunahikizwa kwa hachi, kanwani kunahikizizwa kwa mubfonyo. *Warumi 10. 9, 10.*

Koro na tei mubfonyegwa ni faro, nolawe si kwa nywinywi, ni tola ya Muungu. *Waefesi 2. 8.*

Koro yude jwonse ahanie sari dya Bwana, kadzabfonyegwa. *Warumi 10. 13.*

Nae anidzie dugha, sinamudarabanze. *Yohana 6. 37.*

Ndiwo moja usiwosia wakuhambuye,
wewe Muungu jwa hachi heketu, nae
umuhumie, Yesu Kristo. *Yohana 17. 3.*

Kubfonyegwa Ni Mwazi Wa Yesu.

Kenge yeo mwa mwa Kristo Yesu,
nywinywi, mukaieo kuye, mudza ha-
fufi ni mwazi wa Kristo. *Waelesi 2. 13.*

Mwazi wa Yesu Kristo mwanawe
anahudheresa kwa navise zonse.
1 Yohana 1. 7.

Koro idsakiza, ya kwamba ndie,
mwakwe kukae kudzaa kwonse, na
kwa jeje vimanyaniswe vyonse dzu
yakwe jeje, akisa kuhenda naghae ni
mwazi wa muhiwe wa mpadsa.

Wakolosai 1. 19, 20.

Mukimanya, kwamba ntamkugujwa na vija vivyonanangika, dza fwedha ambu dhahabu . . . ela na mwazi wa chima wa Kristo. *1 Petro 1. 18, 19.*

Ni huyu hunao mubfonyo kwa mwaziwe, mayadso ya madsoa ni java wa teiye. *Waefesi 1. 7.*

Koro mwazi ndiwo wiwonahenda umanyaniso kwa moja. *3 Musa 17. 11.*

Ndokomo hivi muntu akiwa mwa Kristo ni chuimbe kibfya, ya kae yachia, tayowa yonse yagala mabfya. *2 Wakorinti 5. 17.*

Ruhu Mudheru.

Nami nidzamuyomba Baba, nae kadzamuyehea muvonea yungine, awe nanywi maishi: Ruhu ya hachi yusi-

yoweza kubfokea lumwengu, kwa kwamba ntajunamuona, nolawe kumumanya, kenge nywinywi mumumanya, koro anakaa kwenu, na kuwa mwenu.

Yohana 14. 16, 17.

Kenge muvonea, Ruhu Mudheru, adzemuhuma Baba sarini mwangu, ndie adzemuyongweza yonse.

Yohana 14. 26.

Namdsesikitisa Ruhu Mudheru jwa Muungu, amungizie muhuri nsiku ya mubfonyo.

Waefesi 4. 30.

Mwendende ruhuni, na makajela ya nyama ntamukudzayatimiza.

Wagalatia 5. 16.

Koro wonse wayongozejweo ni Ruhu ya Muungu, ndiwo waana wa Muungu.

Warumi 8. 14.

Mudzae Ruhu.

Waefesi 5. 18.

Tunda dya Ruhu ndidyo madsako,
dsekea, naghea, kuitisa, umpoe, mema,
duda, woo, kudzumiza, dzu ya hawa
ntaku sheria. *Wagalatia 5. 22, 23.*

Udheru.

Koro miro ya Muungu, ndiyo udheru
wenu. *I Watesaloniki 4. 3.*

Uwadherese hachini, chuucho ndicho
hachi. *Yohana 17. 17.*

Koro mudheresa na wadheresejweo,
wonse kwa mumodza, kwa hivyo
nkanaona yudswa kuwahana wandu-
gu. *Waebrania 2. 11.*

Hivi nanywi mwambe, kwamba mui-
fwia navise, kenge munamukaia moja
Muungu mwa Kristo Jesu.

Warumi 6. 11.

Kenge sasa, kwamba mugala huru naviseni na kuhendwa wahumisi wa Muungu, munayo matunda yenu ya kudhereswa, na mwisowe ni moja usiwosia. *Warumi 6. 22.*

Kenge Muungu jwa naghea amudhere-se kabisa, na kugale gulufu ruhu yenu, na moja na mwii, na kwamijwa bfasibfo tamba kwa kudza kwakwe Bwana jwehu Yesu Kristo. Amuhanie ni muhikizika, nae anayahenda.

I Watesaloniki 5. 23, 24.

Kuyomba.

Mwivyonayomba sarini mwangu, nidzavihenda. Baba akuzwe kuzimu ya Mwana. Mukiyomba kintu sarini mwangu, nidzavihenda. *Yohana 14. 13, 14.*

Mukikaa mwangu na vyuuo vyangu
vikikaa mwenu, hivi yombani mwivyo-
nadsaka, vinamuwea. *Yohana 15. 7.*

Yombani, hivi mudzabfegwa, dsekea
yenu itimizwe. *Yohana 16. 24.*

Kula mudsakedyo kuyombani, muki-
hikiza, dimuwee. *Marko 11. 24.*

Muyombe nsiki zonse na mayombo na
maririo yonse ruhuni, na kawii mumire
na kwitisa kwonse, na kuwayombea
wadheru wonse. *Waefesi 6. 18.*

Yombani bfasibfo kuyadsa.

1 Watesaloniki 5. 17.

Kuhumikia Na Kuoneswa.

Hivi Yesu kawambia: Adsakie ku-
niuba adzikanie mwenye, adsukuye
muhiwe wa mpadsa na kuniuba.

Matayo 16. 24.

Kenge Muungu anaweza kuhenda kula mvoni kufwachaa dzu yenu, kwamba kwa mambo yonse, ngera zonse, mufurume kabisa, na kuwa na vinji kuchia cheo.

2 *Wakorinti* 9. 8.

Hivi ndugu mumie, mudsesukusika, mukifwachaa kazini mwa Bwana saa zonse. Mukimanya, kwamba sumbuko dyenu si bure mwa Bwana.

1 *Wakorinti* 15. 58.

Koro kwa dzambo dya Kristo mufegwa na tei si kumuhikiza tu, ela kumuonesezwa dsungu vivyo.

Wafilipi 1. 29.

Mukionegwa kwa dzambo dya hachi, mwanaghea. Mudseshoga oga wao, nolawe namdsedadamaa.

1 *Petro* 3. 14.

Mukinyirwa kwa dzambo dya sari dya Kristo mwanaghea gulufu, koro

ruhu ya marembo, ndiyo ruhu ya Muungu, inamusukia nywinywi.

1 Petro 4. 14.

Uhumisi Wa Sanamu Ubigwa Sera Ni Muungu.

Ndimi Bwana Muungu jwako, nkudzoue na miungu mingine usoni kwangu. Nkudzodzhendee yumbo nolawe nkudzodzhendee menganyo yade yonse, yeyobfo dzu yuwinguni, nolawe yeyobfonsi, nolawe yeyo madzini kuzimu yansi. Nkudzoiyombe, nolawe nkudzoihumikie. Koro mimi ndimi Bwana Muungu jwako, ndimi Muungu niwe na wivu.

2 Musa 20. 2-5.

Koro miungu yonse ya veti ni viwi, kenge Yehova kahenda mbingu.

Zaburi 96. 5.

Humanya, kwamba sanamu ntaku-
kintu lumwenguni, ntaku Muungu
ela mumodza. *1 Wakorinti 8. 4.*

Hivi swiswi ndivyo hunae Muungu
mumodza, Baba, vyonse viyawa kwa-
kwe, naswi hwa dzu yakwe, na Bwana
mumodza Yesu Kristo, kwae vimawa
vyonse, naswi kwae. *1 Wakorinti 8.*

Hivi Yesu kawambia: Ninukia habfa
Shatani. Koro vyoregwa: Bwana
Muungu umugwie na kumuhumikia
jeje heketu. *Matayo 4. 10.*

Hivi yagani maungo yeyobfonsi:
Ranga, kinaya, shuguu, hamile nzuka
na kudsafuruma, ndiwo uhumisi wa
sanamu. Kwa dzambo dya haya
ngoro ya Muungu inakudza dzu ya
waana wasiwohikiza. *Wakolosai 3. 5, 6.*

Kuudziza Mubfonyo Wa Muungu Kuna Hatari.

Aswi hudzadaramadze, hukidsayowa
mubfonyo mukuu dzao. *Waebrania 2. 3.*

Amuhikizie Mwana, ana moja usi-
wosia; asimuhikiza Mwana, nkanaona
mojo, ela ngoro ya Muungu inakaa
dzu bfakwe. *Yohana 3. 36.*

Amuyongwezee kudarama ngoro ya
usoni ni ga? *Luka 3. 7.*

Ashindie, anayadala haya, nami ni-
dzamuwea kwakwe Muungu, nae ka-
dzaniwea kwangu mwana. Kenge
woga, na wasiwohikiza, na wazuka,
wewo na mambo ya kinaya na wayaji,
na waranga, na wadsawi, na wayo-
mbeo masanamu, na wansue, dhango

dyao ni ziwani, dibfiedyo na moho na kibiriti, ndiko kufwa kwa bfii.

Ubfenuyo 21. 7, 8.

Kubfonyegwa Kwa Vizuka Na Kwa Nguvu ya Shatani.

Kenge Muungu wa naghea kadza-
muranga Shatani hafufi nsi ya maguu
yenu.

Warumi 16. 20.

Mumushade Baba na dsekea, amuwe-
zesee kwa dhango dya kudala kwa
wadheru muyangani, ahunyunyurie
kwa nguvu za kiza, na kuhungiza
uhajuni mwa Mwana jwa madsakoye.

Wakolosai 1. 12, 13.

Kwa hivyo Mwana jwa Muungu ka
funujwa, ayanange mahendo ya Sha-
tani.

1 Yohana 3. 8.

Bwana jwehu Yesu Kristo, adziyavize mwenye kwa dzambo dya navise zehu, ahubfonye kwa huju lumwengu yuzuka, kwa miro ya Muungu na Baba jwehu, nzakwe marembo maishi na maishi.

Wagalatia 1. 3-5.

Muvwae selaha zonse pia za Muungu, muweze kusumama dzu ya mafitina ya Shatani.

Waefesi 6. 11.

Kenge Muungu ashadwe, ahubfie ku-shinda kwa Bwana jwehu Yesu Kristo.

1 Wakorinti 15. 57.

Kudza Kwa Bfi Kwa Yesu Kristo.

Nakudza kawii, nidzamuhwaa kwangu, kwamba nibfo mimi nanywi muwebfo.

Yohana 14. 3.

Huyu Yesu abfazijwe kwenu, kwenda yuwinguni, kadzauja kawii, dza muonevyo kwenda yuwinguni.

Mahendo 1. 11.

Koro jeje Bwana kadzasuka na yuwinguni na hano dya amri, na idzwi dya malaika mkuu, na tarumbeta ya Muungu, na wafu mwa Kristo wadza-fufuka dura. Makisa swiswi, husaiyeo na kuwa moja, hunabfazwa na mawingu, kutongana nae angani, na hivi hudzawabfo kwa Bwana maishi.

1 Watesaloniki 4. 16, 17.

Adzebfoakamafunujwa naswi hudzawa dzae, koro hudzamuona dza aivyo.

1 Yohana 3. 2.

Hivi mirani, koro ntamudzi saa ya kudza kwa Bwana jwehu. Kwa hivyo

nanywi muwe tayari, koro Mwana
jwa Adamu anakudza saa musiyoma-
nya nywinywi. *Matayo 24. 42, 44.*

Tayowa nakudza hafufi, na tuvo
dyangu bfamodza nami, nimubfe kula
muntu na mahendoye. *Ubfenuo 22. 12.*

Amin, nzo Bwana Yesu. *Ubfenuo 22. 20.*

Kachuo haka kana vidinku
vingine vya Madsoro Madheru,
ndiyo Chuo cha Muungu. Una-
damigwa muno kudzipatia
Damano Ibfya na kudisoma
mwenye, koro ndiyo ubfenuo
wa hachi ya Muungu.